


U ovom broju, između ostalog, čitajte:

- **Ispunjeni uvjeti za otpočinjanje rada Poslovno-obrazovnog centra UPFBiH**
- **Rukovodstvo UPFBiH održalo više sastanaka o minimalnoj plaći**
- **Članovi UO UPFBiH usvojili više odluka**
- **Održana sjednica ESV-a FBiH**
- **Uskladiti pravilnike o tehničkim pregledima vozila na federalnom i državnom nivou**
- **UPKS traži hitno stavljanje van snage odluka o enormnom povećanju komunalnih taksi**
- **Ekonomsko-socijalno vijeće KS zatražilo utvrđivanje novih odluka o komunalnim taksama**



Ispunjeni uvjeti za otpočinjanje rada Poslovno-obrazovnog centra UPFBiH

Vlada KS donijela Odluku kojom se daje saglasnost za osnivanje



Ministarstvo za odgoj i obrazovanje Kantona Sarajevo izdalo je Udruženju poslodavaca FBiH Rješenje o ispunjenosti uvjeta za rad organizatora obrazovanja odraslih i Rješenje o upisu u Registar organizatora obrazovanja odraslih čime se stiču uslovi za otpočinjanje rada Poslovno-obrazovnog centra UPFBiH.

Ministarstvo za odgoj i obrazovanje KS je prethodno formiralo Ekspertnu komisiju koja je dala Stručno mišljenje o društvenoj opravdanosti osnivanja i rada organizatora za formalno i neformalno obrazovanje odraslih te izvršila uvid u priloženu dokumentaciju i uvjete u objektu te konstatirala da su osigurali uvjeti za rad u skladu sa važećim Zakonom o obrazovanju odraslih i Odlukom o standardima i normativima za realizaciju programa za obrazovanje odraslih.

Vlada KS je na sjednici održanoj 17.03.2022. godine donijela Odluku kojom se daje saglasnost za osnivanje, rad i obavljanje djelatnosti obrazovanja odraslih. Cilj Poslovnog trening centra UPFBiH je cilj osposobljavanje, prekvalifikacija i dokvalifikacija deficitarnih kadrova. Programima obuke će se vršiti edukacija za zanimanja koja su tražena na tržištu rada, a prvenstveno po osnovu zahtjeva članica. Dugoročni učinak ovakvog pristupa se ogleda u smanjenju stope nezaposlenosti, proširenju kapaciteta privrede, osvajanju novih tržišta i u konačnici povećanju javnih prihoda po osnovu direktnih i indirektnih poreza.


Održana sjednica UO Udruženja poslodavaca FBiH



Na sjednici Upravnog odbora Udruženja poslodavaca Federacije BiH, održanoj 05. marta 2022. godine, članovima je najprije prezentovana Odluka o formiranju RobHuba, Odluka o formiranju Biznis Huba i Odluka o pokretanju aktivnosti o osnivanju privrednog društva za obavljanje stručnih poslova iz oblasti zaštite na radu. O Odluci o pokretanju aktivnosti o osnivanju privrednog društva za obavljanje stručnih poslova iz oblasti zaštite na radu će se članovi izjašnjavati na narednoj sjednici, dok su odluke o formiranju RobHuba i Biznis Huba usvojene.

Također, članovi su upoznati i sa odlukama o izmjenama i dopuna Pravilnika o radu UPFBiH i Odluke o osnivanju Centra za edukaciju.

Članovi su jednoglasno podržali inicijativu za proširenje primjene granskih kolektivnih ugovora koje je potpisalo Udruženje poslodavaca Federacije Bosne i Hercegovine i to Kolektivnog ugovora o pravima i obavezama poslodavaca i radnika za djelatnost proizvodnje i prerade metala u Federaciji BiH, Kolektivnog ugovora za djelatnost drvne i papirne industrije u



Federaciji BiH, Kolektivnog ugovora o pravima i obavezama poslodavaca i radnika za djelatnost građevinarstva u Federaciji BiH, Kolektivnog ugovora o pravima i obavezama poslodavaca i radnika za djelatnost trgovine u Federaciji BiH i Kolektivnog ugovora o pravima i obavezama poslodavaca i radnika za djelatnost cestovnog prometa za teritoriju Federaciji BiH. Inicijativa podrazumijeva proširenje primjene granskih kolektivnih ugovora i na druge poslodavce koji nisu članovi udruženja poslodavaca – strane kolektivnog ugovora, za koje se ocjeni da postoji opravdani interes radi ostvarivanja ekonomske i socijalne politike u Federaciji u cilju osiguranja jednakih uslova rada.



Na sjednici je raspravljano i o pitanju rada studenata. Naime, određene privredne djelatnosti, posebno turizam, imaju veliki problem sa odlaskom radnika u susjedne zemlje tokom sezone, te je istaknuto da se ovaj problem može riješiti kroz zapošljavanje studenata na obostranu koristi i poslodavaca, a i studenata koji

iskazuju interesovanje za studentskim radom. Članice se podržali inicijativu za rješavanje ovog pitanja, te će Udruženje u narednom periodu poduzeti aktivnosti da se ovo pitanje i zakonski riješi.

Članovi Udruženja poslodavaca FBiH donijeli su odluku da UPFBiH finansijski podrži događaj "Topic oriented optimized learning: Leaders of tomorrow 8" u organizaciji Udruženja studenata elektrotehnike Europe EESTEC koji će se održati krajem maja tekuće godine. Ovaj događaj ima za cilj osposobljavanje pojedinaca za angažman u nevladinom



sektoru kroz sticanje potrebnih znanja i alata za preuzimanje liderskih pozicija, vještina upravljanja timom i projektima te uz poticanje kreativnosti, razmjene ideje i iskustava i znanja studenata elektrotehnike. Projekat također ima za cilj i promociju Sarajeva, kulture i historije Bosne i Hercegovine među stranim studentima.

Smailbegović: Potrebna korekcija Prijedloga zakona o minimalnoj plaći

Smatra da se Prijedlog u cilju usklađivanja treba razmatrati sa još četiri zakona



Sjednica Ekonomsko-socijalnog vijeća za područje Federacije Bosne i Hercegovine održana je 13. aprila 2022. godine.

Predsjednik delegacije poslodavaca ESV-a Adnan Smailbegović izjavio je nakon sjednice da je Prijedlog o minimalnoj plaći u Federaciji BiH u koliziji sa mnogim zakonima te da ga je potrebno korigovati.



Kazao je da im je Ministarstvo finansija Federacije BiH tek jučer dostavilo Prijedlog zakona o minimalnoj plaći koji je usaglašen sa reformskim prijedlozima zakona o dohotku i porezu na dohodak, ali da su na sjednici ESV-a odlučili da je nemoguće diskutovati o njemu zbog kratkog roka.

Smatra da se taj prijedlog u cilju usklađivanja treba razmatrati sa još četiri zakona, a to su: zakoni o doprinosima i porezu na dohodak te izmjene

Zakona o radu i Zakona o zdravstvenom osiguranju.

Smailbegović je istakao da su se predstavnici poslodavaca i sindikata dogovorili da će u narednih deset dana pokušati usaglasiti svih pet zakona te da će nakon toga zakazati tematsku sjednicu ESV-a na kojoj bi diskutovali.

Na kraju je dodao da su na sjednici, pored ostalih tačaka, problematizirali nedostatak radne snage te razmatrali mogućnost liberalizacije uvoza deficitarne radne snage.

Predsjednik Saveza samostalnih sindikata Bosne i Hercegovine Mevludin Bektić smatra da je 1. januar 2023. godine dalek rok za primjenu zakona o minimalnoj plaći, kako je predložila Vlada Federacije BiH, te da će tražiti izmjenu Uredbe o metodologiji usklađivanja najniže plaće u Federaciji BiH kako bi je pokušali uskladiti s porastom cijena.



Tvrdi da je deset mjeseci predug period, budući da se očekuje galopirajuća inflacija te je izrazio zabrinutost za ostanak radne snage u BiH, jer minimalna plaća neće biti dostatna za "golu" egzistenciju većine radnika.

Bektić je istakao da su poslodavci tražili mogućnost liberalizacije uvoza deficitarne radne snage, ali da je ključni elemenat povećanje plaće, kako bi domaći radnici ostali u Bosni i Hercegovini.

Rukovodstvo UPFBiH sa predsjednikom Kluba delegata bošnjačkog naroda u Domu naroda PFBiH Jasminom Duvnjakom




Rukovodstvo Udruženja poslodavaca Federacije Bosne i Hercegovine, predsjednik Adnan Smailbegović i direktor Mladen Pandurević, zajedno sa rukovodstvom Grupacije poslodavaca Zeničko-dobojskog kantona pri Udruženju poslodavaca FBiH, predsjednikom Upravnog odbora Kasimom Kotorićem i potpredsjednikom UO Ibrahimom Meškićem, održali su 19. aprila 2022. godine sastanak sa predsjednikom Kluba delegata bošnjačkog naroda u Domu naroda Parlamenta Federacije BiH Jasminom Duvnjakom.

Prisutni su razgovarali o Prijedlogu zakona o minimalnoj plaći, ali i ostalim zakonima od značaja za privredu, kao i aktivnostima Udruženja poslodavaca FBiH.

Cilj sastanka je bio unapređenje komunikacije, ali i saradnje u mnogim oblastima koje mogu doprinijeti poboljšanju poslovnog ambijenta u Federaciji BiH.

Članovi UO UPFBiH usvojili više odluka



Na sjednici UO Udruženja poslodavaca FBiH, održanoj 14. aprila 2022. godine, usvojena je Odluka o pokretanju aktivnosti za rad na osnivanju privrednog društva za obavljanje stručnih poslova iz oblasti zaštite na radu, Izmjene i dopune Pravilnika o radu UPFBiH, Odluka o dopuni Odluke o osnivanju Centra za edukaciju te Inicijativa za proširenje primjene granskih kolektivnih ugovora koje je potpisalo Udruženje poslodavaca FBiH.

Također, s obzirom da direktoru UPFBiH Mladenu Pandureviću ističe mandat 30.04.2022. godine, članovi su donijeli odluku o imenovanju Mladena Pandurevića za v.d. direktora UPFBiH na period od kraja aprila do 31.07.2022. godine te donijeli Odluku o imenovanju direktora UPFBiH koji će ovu funkciju preuzeti 01.08.2022. godine.

U nastavku sjednice, članovi su raspravljali o Prijedlogu zakona o minimalnoj plaći u FBiH koji je u koliziji sa mnogim zakonima, a koji su članovi ESV-a FBiH dobili dan prije održavanja sjednice ESV-a (13.04.2022.) te o istom nisu htjeli raspravljati na sjednici ESV-a. Istaknuto je da obaveze iz ovakvog prijedloga poslodavci neće moći podnijeti. Poslodavci su istakli da nisu protiv povećavanja minimalne plaće ali da se prvo moraju stvoriti uslovi za to, odnosno da se moraju smanjiti porezna davanja državi. Upravni odbor je oformio pregovarački tim koji će u narednom periodu pokušati približiti stavove sa Sindikatom prije održavanja tematske sjednice ESV-a FBiH na ovu temu.

Član UO Safudin Čengić pod tačkom razno predstavio je problem koji pojedini poslodavci imaju zbog stope amortizacije, ali je na sjednici napomenuto da je potrebno više informacija kako bi Stručna služba UPFBiH pripremila inicijativu za rješavanje ovog problema.

Predstavnici UPFBiH s potpredsjednikom FBiH Milanom Dunovićem



Potpredsjednik FBiH Milan Dunović sastao se 26. aprila 2022. godine s predstavnicima Udruženja poslodavaca FBiH. Sastanku su prisustvovali predsjednik Adnan Smailbegović, direktor Mladen Pandurević, članovi UO Nihad Imširović i Safudin Čengić te Mario Nenadić.

Na sastanku je razgovarano o stanju u privredi i izazovi sa kojima se poslodavci i privreda susreću.

Rukovodstvo UPFBiH sa ministrom Drljačom o minimalnoj plaći

Predstavnici UPFBiH održali su 22. aprila 2022. godine sastanak sa ministrom rada i socijalne politike i zamjenikom premijera Federacije BiH Veskom Drljačom.

Tema sastanka je bila Prijedlog zakona o minimalnoj plaći te je rečeno da je ovaj zakon iz nadležnosti kantona, a ne Federacije. Također je naglašeno da minimalna plaća nije iz nadležnosti Ministarstva finansija te pomenuto ministarstvo ne može biti predlagač ovog zakona već Ministarstvo rada i socijalne politike FBiH.

Prisutni su se složili da je tekst Prijedloga zakona nije najbolje formulisan te da ga je neophodno koregovati te da se ne mogu derogirati odredbe Zakona o radu što je slučaj sa tekstom Prijedloga.

Uskladiti pravilnike o tehničkim pregledima vozila na federalnom i državnom nivou



Direktor UPFBiH Mladen Pandurević održao je 13. aprila 2022. godine sastanak sa pomoćnikom ministra cestovnog prometa i sigurnosti cestovnog prometa Ministarstva prometa i komunikacija FBiH Željkom Matocem. Sastanku je prisustvovala i pravnica UPFBiH Jasmina Kurspahić.

Tema sastanka je bila Pravilnik o preventivnim tehničkim pregledima motornih i priključnih vozila, odnosno ukidanje obaveze vršenja ovog tehničkog pregleda za vozila čija najveća dozvoljena masa ne prelazi 7,500 kg.

Ministarstvo će uskladiti ovaj pravilnik sa pravilnikom na nivou države prema kojem je ovaj problem riješen tako što vozila čija najveća dozvoljena masa ne prelazi 7,500 kg ne plaćaju preventivni tehnički pregled, dogovoreno je na sastanku.

Sastanak predstavnika UPFBiH sa zastupnikom ZD PFBiH o minimalnoj plaći



Predstavnici Udruženja poslodavaca Federacije BiH razgovarali su 21. aprila 2022. godine sa zastupnikom Zastupničkog doma Parlamenta Federacije BiH i direktorom kompanije Variplast Gračanica Mujom Hasićem o Prijedlogu zakona o minimalnoj plaći FBiH.

Sastanku je prisustvovao i predsjednik Udruženja poslodavaca Gračanice Sead Terzić.

Predstavnici Udruženja poslodavaca FBiH upozorili su da Prijedlog zakona nije u skladu sa Ustavom FBiH te da bi kršenje Ustava za posljedicu imalo hiljade tužbi sa milionskim odštetnim zahtjevima. Ove odštetne zahtjeve bi u konačnici platili građani FBiH.

Naglasili su da je neprihvatljivo da se ovakav zakon donosi po hitnom postupku i četiri mjeseca pred izbore te da Ministarstvo finansija ne može biti predlagač ovog zakona jer minimalna plaća nije u nadležnosti Ministarstva finansija.



U konačnici je zaključeno da je neophodno Prijedlog zakona korigovati te u proces povećanja minimalne plaće obavezno uključiti socijalne partnere.

Udruženje poslodavaca Kantona Sarajevo traži hitno stavljanje van snage odluka o enormnom povećanju komunalnih taksi



Udruženje poslodavaca Kantona Sarajevo traži hitno stavljanje van snage odluka općinskih vijeća o povećanju komunalnih taksi i njihovom enormnom povećanju. Skoro sve općine, visinu komunalnih taksa povećale su za 500 pa do 2000 posto, saopćeno je na konferenciji za novinare UPKS.

UPKS traži da se napravi cjelovita analiza parafiskalnih nameta koju trebaju uraditi predstavnici kantona i općina zajedno sa predstavnicima poslodavaca, kako bi se utvrdilo koji parafiskalni nameti nemaju nikakvo uporište i koje treba ukinuti, a koji imaju svrhu i smisao postojanja.

Također, UPKS zahtijeva preispitivanje odredbi Zakona o komunalnim taksama KS.

"Sva općinska vijeća na području Kantona Sarajevo, osim OV Novi Grad, donijela su odluke o enormnom povećanju cijena komunalnih taksi. UPKS je insistiralo da se precizira granica koliko može iznositi povećanje, no naš apel nije urodio plodom i sada imamo ove odluke koje dodatno opterećuju privredu, koja se još nije oporavila od krize izazvane COVID-19, a trpimo i značajne posljedice ruske invazije na Ukrajinu", kazao je predsjednik Upravnog odbora UPKS Safudin Čengić.

Prema iznesenim podacima predstavnika UPKS, nakon odluka općinskih vijeća u Kantonu Sarajevo, taksa za istaknutu firmu velike kompanije u Općini Centar, koja je prošle godine iznosila od 270 do 300 KM, prema odluci OV sada iznosi od 13.500 do 15.000 KM. Sličan trend, sa manjim iznosima, je i u drugim općinama na bazi čega se može zaključiti da se povećanja visine naknade komunalnih taksa kreće u rasponu od 414,13 posto na Ilidži do 2.045,35 posto u Centru Sarajeva.

"Prema podacima prikupljenim u okviru projekta rađenog sa USAID, poslodavci u BiH plaćaju oko 3.500 parafiskalnih nameta, tri puta više od Srbije i dva puta više od Hrvatske. Prema nekim podacima oko šest posto BDP BiH ili dvije milijarde KM je ostvareno upravo iz parafiskalnih nameta", kazao je predsjednik Skupštine UPKS Nijaz Skenderagić.



Predsjednik Uprave Konzuma i Mercatora u BiH Nihad Imširović naglasio je da nakon odluka općinskih vijeća na području Kantona Sarajevo, ova firma bi ove godine u odnosu na prethodnu godinu trebala platiti 938 posto više komunalne takse za istaknutu firmu.

"Prošle godine smo ukupno platili 19.790 KM takse za istaknutu firmu na području Kantona Sarajevo. Ove godine, nakon odluka općinskih vijeća za ovu namjenu trebali bismo platiti 185.700 KM", kazao je Imširović.

Upozorio je na pogubnost ovakvih odluka koje će natjerati kompanije, poput njegove, da zatvaraju prodajna mjesta i otpuštaju radnike.

"Poseban problem predstavlja činjenica da je kao kriterij za određivanje visine taksi korištena veličina firme. To što je neka firma velika ne znači da je profitabilnija od neke manje", kazao je Imširović.

Inače, Udruženje poslodavaca je organiziralo ovu press konferenciju u okviru Projekta "Doprinos organizacija civilnog društva poboljšanju utjecaja poduzetništva na socio-ekonomski razvoj BiH" koji finansira Europska unija.

Ekonomsko–socijalno vijeće KS zatražilo utvrđivanje novih odluka o komunalnim taksama



Ekonomsko – socijalno vijeće za područje Kantona Sarajevo podržalo je stav Udruženja poslodavaca KS da su visine naknada komunalnih такси, propisane odlukama općinskiх vijeća u Kantonu Sarajevo, neprihvatljive za poslovnu zajednicu.

Zaključak je donesen na sjednici ESV-a koju je organizirala Vlada KS 27.04.2022. godine, s ciljem da se zajedno sa čelnicima općina sagleda šta je sporno u odlukama o visini komunalnih такси koje su donijela općinska vijeća, te kako bi se iznašla najbolja rješenja.

Ekonomsko–socijalno vijeće je tom prilikom i zatražilo od općinskiх vijeća da utvrde naknadu za komunalnu taksu koja će se kretati u realnim okvirima u odnosu na visinu komunalnih такси koje su do sada primjenjivane.

"Pozivaju se općinska vijeća da u periodu od 60 dana naprave cjelovitu analizu primjene Zakona o komunalnim taksama, odnosno efekata vlastitih odluka o visini komunalnih такси, te da u skladu sa rezultatima analize, eventualno promjene odluke o visini komunalnih такси. Ekonomsko – socijalno vijeće za područje Kantona Sarajevo poziva Poreznu upravu Federacije Bosne i Hercegovine da odgodi vrijeme naplate naknade za isticanje firme za 60 dana od nastale obaveze za plaćanje komunalne takse", zaključeno je također.

Zatraženo je i preispitivanje svih parafiskalnih nameta utvrđenih od sva četiri nivoa vlasti u Bosni i Hercegovini, odnosno općinskih, kantonalnih, entitetskih i državnih.

Svi članovi poslovne zajednice su pozvani da, u skladu sa Zakonom o komunalnim taksama i odlukama općinskih vijeća o visini komunalnih taksi, prijave isticanje firme.

Ministrica za rad, socijalnu politiku, rasljena lica i izbjeglice KS i potpredsjednica ESV-a Ivana Prvulović naglasila je da je Vlada KS već ranije zauzela stav o odlukama koje su donijela općinska vijeća i smatra da odluke treba preispitati.

"Ono što želim naglasiti je da je u skladu sa Zakonom o komunalnim taksama KS, u nadležnosti općinskih vijeća donošenje kriterija i visine komunalnih taksi. Po zakonu i sav prihod od komunalnih taksi pripada općinama. Vlada Kantona Sarajevo je u ovom slučaju preuzela ulogu medijatora između poslodavaca i opština. Očekujemo da će zaključci koje je donijelo ESV KS biti ispoštovani", izjavila je ministrica Prvulović.


Podsjetila je da je, u skladu sa pravom na lokalnu samoupravu, prilikom utrdivanja Zakona o komunalnim taksama, Vlada odnosno Skupština KS prepustila općinama da odrede visinu taksi.



Predsjednik ESV-a Safudin Čengić, u ime poslodavaca je izjavio kako je neophodno da se na bazi stručne i usporedne analize, sa sličnim zakonima u BiH i zemljama okruženja, utvrde kriteriji na osnovu kojih će se plaćati komunalne takse, a koje neće biti drastične kao sada.

"Prikupljanje prihoda od taksi jeste u nadležnosti općina, ali kriteriji moraju biti identični, moraju se utvrditi na način da sve firme budu ravnopravne", naglasio je.

Članovi UPKS o visini naknade komunalnih taksi



Članovi Upravnog odbora Udruženja poslodavaca KS održali su 28. aprila 2022. godine hitan sastanak u vezi visine naknade komunalnih taksi. Tom prilikom, predsjednik UPKS Safudin Čenić obavijestio je prisutne da je 27. aprila održana

tematska sjednica Ekonomsko-socijalnog vijeća za područje KS na ovu temu, te da su doneseni sljedeći zaključci.

1. Ekonomsko – socijalno vijeće za područje KS podržava stav Udruženja poslodavaca Kantona Sarajevo da su visine naknada komunalnih taksi, propisane odlukama o visini komunalnih taksi donesenih od strane općinskih vijeća, neprihvatljive za poslovnu zajednicu;
2. Ekonomsko – socijalno vijeće za područje KS poziva Poreznu upravu Federacije Bosne i Hercegovine da odgodi vrijeme naplate naknade za isticanje firme za 60 dana od nastale obaveze za plaćanje komunalne takse;
3. Pozivaju se općinska vijeća da u periodu od 60 dana naprave cjelovitu analizu primjene Zakona o komunalnim taksama, odnosno efekata vlastitih odluka o visini komunalnih taksi, te da u skladu sa rezultatima analize, eventualno promjene odluke o visini komunalnih taksi;
4. Ekonomsko – socijalno vijeće za područje Kantona Sarajevo traži od općinskih vijeća da utvrde naknadu za komunalnu taksu koja će se kretati u realnim okvirima u odnosu na visinu komunalnih taksa do sada primjenjivanih;
5. Pozivaju se članovi poslovne zajednice da, u skladu sa Zakonom o komunalnim taksama ("Službene novine Kantona Sarajevo", broj: 8/22) i odlukama općinskih vijeća o visini komunalnih taksi, prijave isticanje firme;
6. Ekonomsko – socijalno vijeće za područje Kantona Sarajevo traži preispitivanje svih parafiskalnih nameta utvrđenih od strane svih nivoa vlasi u Bosni i Hercegovini.

Dogovoreni su naredni koraci u rješavanju ovog problema, odnosno da će se organizovati sastanci sa predstavnicima općinskih vijeća i da će se napraviti cjelovita analiza parafiskalnih nameta.

Održana sjednica UO Udruženja poslodavaca Kantona Sarajevo



Članovi Upravnog odbora Udruženja poslodavaca KS na sjednici održanoj 07. aprila 2022. godine, najprije su razmatrali Zakon o Ekonomsko-socijalnom vijeću za područje KS. Predsjednik UO Safudin Čengić je objasnio da je riječ o radnom materijalu i da je dogovoreno formiranje radne grupa koja će raditi na izradi ovog zakona. Naglasio je da se Zakonom mora jasno definisati uloga Ekonomsko-socijalnog vijeća za područje KS, postupak dostave radnih materijala, odgovor na mišljenje ESV-a i stavove po predloženim zakonskim aktima. Čengić je informisao članove da je stručna služba Udruženja poslodavaca Federacije BiH sačinila i dostavila amandmane na ovaj zakon.

Ministrica za rad, socijalnu politiku, raseljena lica i izbjeglice Kantona Sarajevo Ivana Prvulović objasnila je namjeru zakonodavca prilikom izrade ovog zakona. Zakon o reprezentativnosti na nivou FBiH predviđa uslove koje ispunjavaju mnoga udruženja i sindikati, posebno sindikati. U praksi je problem kako će organizovati rad Ekonomsko-socijalno vijeće u kojem će biti nekoliko udruženja i sindikata, kako napraviti takvo Vijeće funkcionalnim.

Zaključeno je da će Komisija za izradu konačnog teksta Zakona o Ekonomsko-socijalnom vijeću za područje KS uz pomoć UPFBiH sačiniti amandmane na Prijedlog ovog zakona u cilju izrade što kvalitetnijeg teksta Zakona.

Članovi su razgovarali i o pripremama za Skupštinu, te je zaključeno da će se formirati komisija koja će izvršiti potrebne pripreme kako bi se Skupština održala u drugoj polovini mjeseca maja.

Nadalje, predsjednik Skupštine UPKS Nijaz Skenderagić upoznao je prisutne sa problemima sa kojima se poslodavci susreću zbog odredbi Zakona o zakupu poslovnih zgrada i prostorija na području KS. Zakonske odredbe ostavljaju prostor za zloupotrebe od strane pojedinih načelnika. Zakonom je izostavljen kanton u drugostepenom postupku, odnosno prvostepeni i drugostepeni postupak je općinski načelnik. Poslodavci zahtijevaju izmjenu samo jednog člana Zakona, na način da u drugostepenom postupku ima neki viši organ.

Ministar privrede KS Adnan Delić informirao je prisutne da je formirana ekspertna komisija u kojoj su uključene sve lokalne samouprave i grad Sarajevo i koja ima rok od 60 dana da se pripremi novi Nacrt zakona. Nakon toga će uslijediti javna rasprava i poslodavci će imati priliku da dostave svoje komentare i prijedloge. Zaključeno je da će UPKS dostaviti ministru privrede Kantona Sarajevo inicijativu za izmjenu člana ovog zakona kako bi se isti uputio u dalju proceduru.

U raspravi o Prijedlogu zakona o izmjenama i dopunama Zakona o plaćama i naknadama u javnim ustanovama iz oblasti socijalne zaštite u KS, ministrica za rad, socijalnu politiku, raseljena lica i izbjeglice Kantona Sarajevo Ivana Prvulović informisala je prisutne da u javnim ustanovama iz oblasti socijalne zaštite postoji problem jer nije regulisana dodatna naknada za otežane uslove rada. Shodno tome, Vlada KS usvojila je Prijedlog zakona o izmjenama i dopunama Zakona o plaćama i naknadama u javnim ustanovama iz oblasti socijalne zaštite u Kantonu Sarajevo. Izmjenom Zakona predviđeno je da zaposleniku koji obavlja poslove pod otežanim uslovima rada pripada pravo na uvećanje plaće u visini do 20% od osnovne plaće.

Članovi su u diskusiji ukazali na nedostatke i rizike Prijedloga zakona. Ukoliko se Zakon usvoji u predloženom tekstu ostavit će prostor za zloupotrebe, te je neophodno jasno propisati na koga se Zakon odnosi. Donesen je zaključak da će Stručna služba UPFBiH pripremiti primjedbe na Prijedlog zakona koji će se dostaviti će se nadležnom Ministarstvu.

Osim članova Upravnog odbora, sjednici su prisustvovali i predsjednik Skupštine UPKS Nijaz Skenderagić, zamjenica predsjednika Skupštine UPKS Amela Hrbat, predstavnica Konzuma/Mercatora Nedeljka Bilić, direktor Sarajevostana Mario Nenadić, ministar privrede Kantona Sarajevo Adnan Delić i ministrica za rad, socijalnu politiku, raseljena lica i izbjeglice Kantona Sarajevo Ivana Prvulović.



UDRUŽENJE POSLODAVACA

**UDRUŽENJE POSLODAVACA FBiH
MARŠALA TITA 6, 71 000 SARAJEVO**

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba